

Yu Xa'aqxt'iyunu' Karta yu Ts'oqlhi ni Pedro

Ni Pedro jamastak'ay yu talhakapu'an Jesucristo

1 ¹ Kit'in kSimón Pedro, ix'oqxtamati Jesucristo y vachu' ixtamalaqachan kunita. Klats'oqniyau ni uxiknan yu lhak'ap'up'inat'ik yu ayaj xtapol, vachu va chun tacha kijnan. Chuncha val porke Jesucristo yu kiDiosk'an y kiJamalaqtaxtunuk'an va si ox makay axtoqnu'.

² Ayaj katamapaynin ni Dios y oxamaktaun katamakan por misp'ayat'ik ni Dios ali Jesús kiJalhachimo'onuk'an.

Tas kataputsukul ixlapanakni Jesucristo

³ Kun ixtap'asta ni Dios kintaxtaqnin tachun yu maqsk'iniyau la ketsukuntik'an para lay kato'oyau. Chuncha val por mispau ni Dios yu kintajunta'in por ayaj ox junita. ⁴ Por ix'oixitu kintajunin ni kintamakanian yu laj'ay axtoqnu' yu ayaj xtapol para chuncha mimputsukuk'an kaval tacha ixputsuku ni Dios. Ex chuncha lay kalaj'osmaj'ant'ik axtoqnu' yu mami'oni y metsukuntik'an, axtoqnu' yu alin lakamunukpa' por ayaj talakanajun katamakal. ⁵ Xlihyucha jantu vamun lhak'ap'up'inat'ik, vachu' k'at'ap'asnit'ik para ox kat'i'ukxunt'ayat'ik. Ox kat'i'ukxunt'ayat'ik kun jatapastak'ati. ⁶ K'alhits'uk'ut'ik jatapastak'ati, vachu' ox k'alhist'akk'ant'ik. Ox kalhist'akk'ant'ik kun maqantaulati. K'ama'ant'aulat'ik, vachu' kat'o'oyat'ik ni Dios. ⁷ Kat'o'oyat'ik ni Dios y vachu' k'alampap'aynit'ik tacha t'alaqaunin. K'alampap'aynit'ik kun japaxkanti.

⁸ Incha tachun yu aniy alin la metsukuntik'an y apalay talhavay ex jantu vali'iy kuna' metsukuntik'an. Vachu kaxajtachal yu ox por misp'ayat'ik Jesucristo kiJalhachimo'onuk'an. ⁹ Pero

ta'ayu' yu jantu chun katijuntayal, yucha lhi'akxajachal tacha taun la'ach'ix yu jantu maqati lakacha'an. Va lajkauk-maj'an ni ixmalaqmixinikantacha ixtala-qalhin yu p'unaj ixmakay. ¹⁰ Xlihyucha, ket'alaqaunin, k'at'ap'asnit'ik para chuncha k'a'ukxunt'ayat'ik. Ex lay kak'ats'at'ik ni tajunta'itan y talaksaktan ni Dios. Incha chuncha mak'ayat'ik ex jantu aqtaun k'amak'aunt'ijlayapitik. ¹¹ Ex chuncha ayaj ox laqa achatí kala'a'ik'anapitik ta'an jantu aqtaun mi'ojoy ixjalhachimo'on Jesucristo, yucha kiJalhachimo'onuk'an y kiJamalaqtaxtunuk'an.

¹² Xlihyucha klataylhaanau mapastak-ninin tachun yu aniy mas k'ats'ayat'ikcha y t'aylhip'inat'ik kun ni chivinti yu laqsaval, yu lanit'ik. ¹³ Kit'in khilay tejkan vananaj ikt'ajun va kimpaxtoqnyi kaklamapastaknichoqoo ni aniy. ¹⁴ Ijk'a-tsay niman kakniya!. Va chuncha kijunil kiJalhachimo'onuk'an Jesucristo.

¹⁵ Kakmakaya' laqatap'asta para lay kap'ast'ak'alhit'ik yu aniy tejkan kakniya!.

Yu talaqts'il ix'ayaxtu ni Jesucristo

¹⁶ Klamasuniu ixtap'asta ni Jesucristo, vachu klamasuniu va kamincho-qoya!. Jantu vali'iy kuentos kaval yu lajk'us jamakanti. Kijnan va laqsaval klaqts'iu ix'ayaxtu la kintalakavantik'an. ¹⁷ Klaqts'iu tejkan kimPay Diosk'an ay makal, tus t'oqx ixlakatunkujunta. Va qasmakkal taun chivinti yu minchal kun yu ox ayaxtu ni Dios, va naunkal: "Yucha yu aniy ni kes'at'a yu k'achaniy, va khli'achantajuy por yucha." ¹⁸ Kijnan' an ijqasmakvi ni anchuan chivinti yu minchal tus lakt'ian. Va ch'antaun xaktayanau ni laka aspajun ta'an ix'alinta Dios.

¹⁹ Chuncha apalay k'atsayau ni laqsaval chuncha val ixchivintik'an yu maqancha ixtalaqput'e ey ixchivinti Dios.

Yucha maqsk'iniy kamak'at'ik kuenta, va tacha taun maklku yu mapulkuy laka puts'isni' tus katunkulcha. K'alhi'ach'an-t'a'ut'ik tacha katasul la melhanutk'an yu ay jast'aku yu xajachil puvakuj. ²⁰ P'unaj maqsk'iniy ox kak'ats'at'ik ni jantu matichun lay kanaul ix'aman yu naunputun ixchivinti Dios yu maqancha ts'oqkanta. ²¹ Ixchivinti Dios yu ixlaqpute'ekan maqancha jantu kaminchal kun yu vali'iy lapanaki. Lapanakni yu vamun Dios ixtata-patsaniy, yu'uncha ixtalaqpute'ey yu ixlak-masuniy ni Espíritu Santo.

Yu tamasuy jalalkanti
(Judas 4-13)

2 ¹ Maqancha xalapanakni Israel ixta'alin lati lapanakni yu jantu vas ixtalaqpute'ey ixchivinti Dios. Vachu chun ka'alina' lati kun uxiknan yu jantu vas katamalaniiyan. Katamanuniyan chivinti yu katalakt'ilhiyan. Katamakauntijlaya' ni Jesús yu jalaqmalaqtaxtul y chuncha kата-paxtoqniyan para ts'alaj kala'a'it'ik maqanlqajnati. ² Katamakaya' axtoqnu' yu jantu laj'oxi, ex lati katalaqt's'i'iyia' makanan tacha yu'uncha. Ex alati lapanakni katalaktu'u'ya' yu laqsalval ox tin. ³ Por ix'akcha'atk'an katamaxtuniyan mintumink'an tejkan katamasuniyan chivinti yu jalalkanti. Tus la maqancha, yu'uncha jalhipakxa'ikanta maqanlqajnati y chavay jantu kataqmaqaya'.

⁴ Dios jantu kamalaqmixinil ni ixmayulnин yu maqancha tamaqtaqlahinil. Va jalaklhilha'al tus laqnin ta'an jalakmakaui tach'inin laka puts'isni'. Va naul ni ancha katataulal tus tejkan kalakmuk'aniya' ixmaqanlqajnatk'an. ⁵ Vachu jantu kama-laqmixinil ni lapanakni yu maqancha ix'alin lakamunukpa'. Va malaqachal xkan tus aqlama'ol ni lakamunukpa', tats'an-qa'ol yu jantu ixtato'oyay Dios. Maxajnichal vamun Noé yu Dios ox ixlaqts'in kun pumatujun alati lapanakni. ⁶ Vachu' jalak-muk'anil ixlaqtaqalk'an ni lapanakni yu ixtavilanl laka putaulan Gomorra kun Sodoma. Ixputaulank'an jalaqxava'ol tus lk'ak'a val para katamakal kuenta yu alati lapanakni yu jantu tato'oyay Dios. ⁷ Dios

vachu' maxajnichal ni Lot, va ox ixlaqts'in. Lot ayaj lhitamaqanchapul ixtala-qalhink'an ni anchunu laktu'unun lapanakni. ⁸ Ni Lot va ox lapanaki. Tus ayaj ixkaniy la ixjalhanuti por lhilhiy ixjalaqts'in y ixqasmat'a ni axtoqnu' yu ixtamakay. ⁹ Ex ni lapanakni yu chuncha tato'oyay Dios, ni Dios k'atsay tacha japu'aqtayjuy tejkan la lhita'y la ixja-tsukuntik'an. Vachu ni lapanakni yu tamaqtaqlahinil, jalaklhit'ajun kun maqanlqajnati tus tejkan kalakachana' ni julchan tejkan kalakmuk'aniya' ixlaqtaqalk'an.

¹⁰ Apalay p'as kalaqmamaqanlqajni-vaya' ni lapanakni yu ayaj tamakay yu tamakaputun la ixlakutajk'an. Vachu' talaktu'uy yu talhit'ajun lhachimo'on. Yu'uncha va ta'ayajnan, vachu' laj'ay tak'atsan. Jantu tatalhanan ni katalak-tanchanil yu talhit'ajun tap'asta lakt'iyan. ¹¹ Pero yu ixmayulnин Dios, mas ayaj talhit'ajun tap'asta ali lhachimo'on, jantu tachivintanuniy ni Dios para kalakmuk'anil ixlaqtaqalk'an yu alati.

¹² Pero ni anchunu vali'iy lapanakni, yu'uncha talhichiviniy axtoqnu' yu jantu tamalaqasiy. Va laktontos talhitsukuti yu tats'anqaniy jatapastak'ati. Va tatsukul para kalakch'apakal y kalaq-maqnikal y vachu va chun tacha talhi-tsukuti kataniya'.

¹³ Kalaklhimapalkana' maqanlqaj-nati tacha ixhilhajatk'an yu tamaqtaqlahinil. Ayaj talhi'achantajuy ixmakaka axtoqnu' laqtaqal mas kaval laka tunkuna'. Vachu ta'an mak'ayat'ik milakvaytik'an, ancha tamakay axtoqnu' lhitamaxanin yu tamaqamay. Va ch'an-taun tavajin kun uxiknan. ¹⁴ La ixlaka-vantik'an vamun tapastak'a katat'atamal yu jantu ixnavink'an kaval, jantu tama-kajun ixtalaqalhink'an. Tamakanuy lapanakni yu jantuka' ox talhakapu'an para katamakal laqtaqal. Yu'uncha ayaj talhit'ajun akcha'ati. Tatauk'aniyachal maqanlqajnati. ¹⁵ Tamakauntijjal yu vas tin, tapatanul la ixtin ni Balaam yu ists'al Bosor. Yucha maqamat kapulhajal tumin por yu laqtaqal ¹⁶ pero ox

laq'aymakal. Yu ixburro, mas jantu lay ixchiviniy, va chivinil tacha chiviniy lapanaki. Va laq'aymal para jantu kamakal tacha qayntaun lokoj yu Balaam.

¹⁷ Ni anchanu lapanakni jantu matichun lay ta'aqtayjuy, va tacha lakxkan yu xista. Va tacha taputs'i yu sunlha'an ni un pero jantu tamay xkan. Tapaxtoqnay kalaklha'ankal ta'an t'alaj puts'ista mas va tavanancha. ¹⁸ P'ays tachiviniy kun laj'ay chivinti yu jantu tu'uchun xtatal kaval. Talakmakanuy lapanakni yu va aniyka' talajqosmaj'anta yu talaqalhin. Tapumakanuy axtoqnu' yu tanajun katamakal la ixlakatunajk'an. ¹⁹ Tanajun ni lay k'amak'at'i yu k'amak'ap'ut'u pero jantu laqsaval kaval. Yu'uncha va xa'oqxtamatin yu talaqalhin. Mas va ta'ayucha kaval, va si alin yu laklhichimo'oy la ixjatsukuntik'an. ²⁰ Tamispal ni Jesucristo kiJalhachimo'onuk'an yu kintamalaqtaxtun. Chuncha talajqosmaj'al xatalaqalhin aniy lakamunukpa', ex astan tamakauntijalachoqol. Yu talaqalhin junchoqol tacha ix'ukxtink'an. Chavay apalay lhita'ay para yu'uncha xajantu tejkan jantuka' ixtamispay Jesucristo. ²¹ Apalay ox ixval incha jantu aqtaun ixtamispal yu lakatin yu Dios ox laqts'in. Va ixlaqlaqput'e'enikantacha yu lhinajun Dios pero astan tamakauntijalachoqol. ²² Kun yu'uncha laqsaval chuncha val ni chivinti yu najun: "Laqataun x'oy anchoqoy una' ixpat'ati. Laqataun p'ax, incha ox kap'axat'i, anchoqoy p'axni laqa pul'amun."

Kaminchoqoya' ni Jesucristo

3 ¹ Uxiknank'an yu klapaxkayau, aqtauncha klats'oqniu y chavaycha aqtauncha klats'oqnichoqoyau. Va klaxtaqniyu jatapastak'ati, para ox kap'a-st'akch'o'ot'ik ² yu ixtanajun ni lapanakni yu maqancha ixlaqlaqput'ey ixchivinti Dios. Vachu kap'ast'akch'o'ot'ik yu lhinaul ni Jesucristo yu kiJalhachimo'onuk'an y kiJamalaqtaxtunuk'an. Yucha tajunchoqon ni lapanakni yu jalaqmalaqachal.

³ P'unaj maqsk'iniy kak'ats'at'ik tejkan va laycha kami'ol ni lakamunukpa', ka'a-lina' lapanakni yu katamakaya' yu

yu'uncha tamakaputun. Katalaktanchaya' yu ox chivinti. ⁴ Katanauna': "Yucha naul ni kaminchoqoya' pero, ¿tisuncha tapasaycha? Jantu aqtaun minchoqoy. Kepayank'an tanitacha y tus va maqancha tejkan aqtaynil ni lakamunukpa' va tacha taylha'antacha." ⁵ Pero yu'uncha jantu tamakaputun kuenta yu inchine'. La maqancha ni lakamunukpa' kun lakt'iyan va ixchivinti Dios pu'alil. Ni lakat'un va xajchal xlhi'akpu' ni xkan, va xkan putsukuy yu alin lakat'un. ⁶ Va xkan pulaqmixlhi ni anchanu lakanmunukpa' tejkan aqlama'ol lakat'un. ⁷ Vachu kun anchanu' ixchivinti Dios, ni lakt'iyan ali lakamunukpa' yu chavaycha alin va lhilkama'akanta para katalaqmixlhi. Katalaqmixa' kun jikmi tejkan kalaqchaama' ni anchanu julchan. Ex kalakmuk'anikana' ixlaqtaqalk'an ni lapanakni kun ixmaqanlqajnatk'an.

⁸ Uxiknan yu klapaxkayau, jantu kak'aukt'ik yu aniy. Ni Jalhachimo'oni' Dios makay taun julchan va tacha taun mil jach'itin y taun mil jach'itin va tacha paqtaun makay. ⁹ Ni Jalhachimo'oni' Dios jantu taqmaqay para kamakal yu naul kamakaya', mas lati talhilay chun taqmaqay. Yucha jantu najun matichun kats'anqal, xlhiyucha va maqant'aqniy kun kijnan. Va najun tachun katamapaxal ixjatapastak'at'k'an.

¹⁰ Jantu matichun k'atsay tavanancha kaminchoqoya' ni Jalhachimo'oni', vachu chun tacha jantu matichun k'atsay tavanancha kamina' qayntaun alhavana' laka puts'isni'. Ni lakt'iyan va tus p'ays qolun kamakat'auna' ex kami'oya'. Tapuchux kalaqxau'oya'. Ni lakat'un kun tachun yu ancha lakkakanta kalaqmixa' kun jikmi. ¹¹ Ex chuncha tachun kalaqmix'oya', xlhiyucha uxiknan ayaj maqsk'iniy kat'i'uqxunt'ayat'ik tacha ixlapanakni Dios yu ox tato'oyay. ¹² Kap'akxan'it'ik ni julchan tejkan kaminchoqoya' Dios. Kalhilqaqlt'ap'ats'a-t'ik para apalay ts'alaj kamil. Anchanu' julchan ni lakt'iyan kalaqmixa' kun jikmi. P'ays kats'asa', tus tachun

axtoqnu' kalaqxt'aj'oya'. ¹³ Pero kijnan k'atsayau yu Dios naul kamakaya'. Xlhiyucha pakxan'itau taun sast'i lakt'iyan kun sast'i lakamunukpa'. Ancha ka'alina' vamun yu Dios ox laqts'in.

¹⁴ Xlhiyucha, ni uxiknan yu klapaykayau yu p'akxan'iyat'ik ni anchanu julchan, kat'amaqxt'aqt'ik ni jantu k'alhits'uk'ut'ik talaqalhin. Jantu ka'lil milaq-taqalk'an para oxamaktaun kat'i'ukxunt'ayat'ik anchanu' julchan. ¹⁵ K'amak'at'ik kuuenta ni kiJalhachimo'onuk'an maqantaulay para lay k'alaqt'axt'ut'ik. Ni Pablo kint'alaqajunk'an yu paxkayau, yucha vachu va chuncha tats'oqnin kun ixjatapastak'ati yu xtaqnil Dios. ¹⁶ Chuncha najun kun tachun ixkartas yu ts'oqlhi. Ancha xanta'an alin chivinti yu lhita'ay para k'amala'asit'i. Alin lapanakni yu jantu ox

talakpastaknan y jantuka' ox talhaka-pu'an. Yu'uncha jantu vas tamasuchqoy yu ts'oqlhi ni Pablo, vachu jantu vas tamasuy yu alati ixchivinti Dios. Chuncha tamaxajniyachal ixmaqanlqajnatk'an.

¹⁷ Ni uxiknan yu klapaxkayau, va k'ats'ayat'ikcha tachun yu aniy. Xlhiyucha k'alhist'akk'ant'ik para jantu katamakanun kun ixchivintik'an ni lapanakni yu jantu tatalhauniy ixlhachimo'on Dios. Jantu k'alhit'amak'aunt'ik ta'an ox alint'at'ik kun Dios. ¹⁸ Kat'aylhip'int'ik la ixjapaxkanti kiJalhachimo'onuk'an y kiJamalaqtuxtunuk'an Jesucristo. Kat'aylhip'int'ik mispanan ni yucha. Yucha ay kamakakal mas va chavaycha y mas va tavanancha. Chuncha kavalcha.